

Dar datti da tuttas sorts scolas en noss bel pajais. E per far curs ch'i dat uschiglio nagliur, san ins anc adina ir tar la scola da club dal Migros. Ma sche gnanc lezza scola porscha il tschertgà, bun, alura han ins magari in problem. Cunzunt sch'ins è armà cun la cruna da la Miss Svizra, il stift cotschen u ina charta cun la medema color.

- Jesses! Ella sa gea gnanc endretg tudestg. Nundetg in'otra lingua svizra. Ed ella vesa gnanc or sc'ina Svizra ("Has vesì ses egls che èn bler memia lunsch in ord l'auter?"). Also na, quella Bianca Sissing è bain in scandal! I bastava ch'il Mister Svizra è in Jugo... Aber uss anc quest qua, quai va memia lunsch.

- Ed ussa ch'el ha ruinà las finanzas da nossa bella patria, avais legi?, ussa discha'l ch'el veglia passentar dapli temp en l'iert da sia dunna. Quel è bain in spinner! Vul el forsa laschar en ses vestgids grischs per far d'ortulan? E savais il megler? Mes ami che lavura sco schurnalist a Berna ha detg ch'il Villiger na vulevia gnanc smetter, ma cura ch'el haja detg al Deiss da cumprar orchideas per l'iert a Mexico da purs indigens ("Quai renda bler dapli da cumprar direct tar quels povers, alura san ins anc martgadar e smatgar il pretsch."), hajai para bastà.

- Ed ussa hai jau marveglias tge che chapita. La finala han set, betg be duas u trais, set (!) hexas da la Rumenia striunà il Meier. Bun, el ha magari laschà giugar memia ditg, aber el saveva gea betg savair che la Rumenia saja uschè tuppa dad anc survegnir in gol en la 95avla minuta. Ed il penalti nun è nagina discussiun, quai nun è stà in foul. Ma quai sa chapitar a mintgin. E quellas hexas han ussa vairamain mess ina smaladicziun sin noss pover Urs! Jau hai già adina detg ch'ins stoppi dar adatg da quels digl ost.

Discurs da la maisa radunda.

En sasez na m'interessesch jau betg per las maisas radundas. Ed en sasez hai jau tut auters problems che da sliar problems da promis e politichers – per exempel il fatg che mes ex-club da ballape, Tavanasa, n'ha anc gudi-gnà nagin gieu, ch'jau na reussescha betg dad installar mes nov pledari grond sin il pc u il fatg ch'jau na chatt betg pli ils cudeschs da la biblioteca da la Scola chantunala (che nun èn mes) e che la bibliotecara m'ha già telefonà – ma sch'i sto pia esser, qua mia proposta: La Sissing, il Villiger ed il Meier emigreschan en l'Antarctica, nua ch'i na dat naginas elecziuns da miss, nagins ministers da finanzas e nagins gieus da ballape. Ma els na duessan betg emblidar da prender cun els insatgi dal Blick (il pli gugent il charedactor) – jeu manegel be, insatge sto la glied gea er leger.

TUPPA
SCHNORRA

– PROBLEMS
SENZA

FIN...

da Rafael Camenisch